

E esfuerzonan grandi di Renny Lacle pa pone number di Aruba na halto rond mundo

ORANJESTAD (AAN): Diabierna anochi 8:04 pm, e conocido Renny Lacle a hala su ultimo rosea. Inmediatamente for di tur skina por a tende reaccion riba e importancia cu e individuo a haci no solamente pa cultura y carnaval di e isla, pero tambe pa eleva number di Aruba den certamen internacional. Aki DIARIO ta trece un tiki mas detaye di loke el a nifica.

MISS ARUBA:

Renny a cuminsa den comishon di Miss Aruba na aña 1995, e aña aki Renny a traha incansablemente pa prepara Miss Aruba Taryn Mansell pa representa Aruba na Miss Universe, e logro di Miss Aruba e aña aki tabata unico y historico pa Aruba ja cu Miss Aruba a keda eligi como prome finalista den e certamen Miss Universe, por a mira claramente cu tur esfuerso y tempo dedica na Miss Aruba a duna resultado enorme. Renny a traha ora nan largo despues di trabao tur dia te den marduga pa asina logra e resultado aki.

E aña nan cu a transcuri Renny a keda traha sin worry cu tempo of siman nan largo pa asina keda trece un certamen di caliber pa Aruba y tambe pa nos Miss Aruba worde reconoci mundialmente. Tur trabao nan tabata voluntario. Tanto pa traha riba adorno nan pa stage te den ora nan di marduga tur dia.

Den solamente 8 aña, Renny a demostra con hopi e por haci den organizacion Miss Aruba y asina ta tuma Miss Aruba full bao di su maneho na aña 2003 como National Director pa Miss Aruba.

Renny a percura pa nos Miss Aruba haya training nan den tur area pa asina nos Miss Aruba ta bon prepara, pa por logra esaki, Renny mes ta duna e Miss Aruba training di Kico tur e Miss Aruba por verwacht ora e ta representa Aruba Internacionalmente. Renny ta zorg pa Miss Aruba haya otro training nan tambe otro persona nan of compaña nan pa Miss Aruba ta bon den tur area. Mayoria training nan ta worde cubri door di Renny su mesun placa.

Nunca Renny no ta pidi nada a cambio, su mensahe ta: "Mi ta haci'e pasobra mi stima Aruba y mi kier pa Aruba su number keda bon Internacionalmente, esey ta hopi importante pa Renny. Anochi nan largo manera keda te 4'or di marduga traha y ya caba ta sigui traha 8'or di mainta, Renny tabata drumi 2 pa 3 ora solamente, ora ta trata pa haci trabao pa Miss Aruba.

Renny ta sigui traha como coach di Miss Aruba dia y anochi nan largo sin alimenta su mes bon pa logra trece un certamen di caliber pa Aruba y mundo henter wak cu un isla chiquito por resalta riba plataforma internacional, tur trabao nan durante aña nan ta voluntario y den tempo liber dus despues di sali di su trabao y den weekend.



Tin momento nan cu Renny ta tuma vakantie pa asina traha henter dia y anochi largo pa Miss Aruba ta prepara optimalmente.

Renny semper a traha cu un team limita dus nunca un team grandi pero asina mes semper ta logra un certamen exitoso tur aña, tanto cu team limita pero tambe sin fondo, pues e certamen ta draai solamente a base di sponsor y regalo nan haya door di compaña nan cu ta kere den e certamen. Pa por logra tur esaki nan, Renny ta bay bishita tur sponsor nan un pa un, pa e por splica kico nan por spera di e donacion cu nan duna. Tur e tempo y gasoline inverti den esaki ta a base di su gusto y voluntariamente.

Segun aña nan ta bay pasando, Renny ta bin cu idea nan astronómico pa evoluciona den tur area pa cu e certamen y cu resultado fenomenal, e ta keda anochi nan largo ta pensa y planea pa asina por logra algo bunita. Aki nan atrobe ta voluntariamente su anochi nan ta bira largo.

Renny tabata traha sin fondo, solamente cu e steun di esun nan cu ta kere den Miss Aruba y e sa di hinca tur cos den otro pa sali victorioso cu cada certamen. E ta prepara cada Miss Aruba optimal pa asina Aruba su number resalta mundialmente cada aña.

E ta traha cu hopi dedicacion y admiracion pa cu e Miss Aruba henter aña pasobra e tin Aruba hopi na pecho y ta bringa pa Aruba keda nombra mas hopi cu por henter aña door di tin contacto cu organizacionnan internacional constantemente.

Tur aña Renny ta hinca placa propio pa asina e logra locual cu mester pa Miss Aruba, sea ta pasashi, cuminda, paña, accesorio, zapato, trahe nan cultural of trahe nan nacional, paga exceso di maleta, doctor, Travel insurance y hopi mas cual ta mucho pa menciona. Renny ta paga di su placa propio sin pidi of spera nada a cambio. Tur ta voluntario, ningun hende ta pidi Renny pa haci esaki, e ta bin di su propio gusto.

Renny ta bay presencia personalmente certamen internacional pa asina duna nos Miss Aruba nan e sosten y pa comproba cu Aruba su number mester worde menciona na tur momento, tur esaki ta bin di su propio placa y ta voluntariamente e ta haci esaki Algun di logro nan cu nos Miss Aruba

nan cu a destaca Internacionalmente; bow di guia di Renny ta:

—Tamara Scaroni, kende a sali Miss Congeniality na Miss Universe, e ta remarcable cu aki nos Miss a mostra con amable nos Arubiano nan ta, cual ta e punto cardinal pa Renny ora di duna Miss nan training.

—Zizi Lee; ta keda como prome finalista na Miss World y a sali Miss World Caribbean.

—Rachelle Oduber a sali Miss World Caribbean na Miss World

Pageant.

—Carol Bruying a sali Miss Dividivi Internacional na Venezuela.

—Gillian Berry a sali den Top pa Miss World Beach.

—Larissa Leeuwe a sali den Top 10 pa Miss Beauty with a Purpose, den Top pa Miss World Sport, den Top pa Miss Beach Beauty y tambe den Top 20 den full e certamen.

—Digene Zimmerman a sali 1st Runner-Up como Miss Hispanoamericana na Bolivia.

—Lynette do Nascimento a sali den Top pa Miss World Sport.

—Charlene Leslie a sali den tur comercial nan di Miss Universe y a sali riba pantaya grandi di Time Square dunando Aruba un sinfin di propaganda Internacionalmente.

—Ghislainne Mejia a sali den Top pa Miss World Sport.

Cu gran satisfaccion Renny ta haya informacion nan aki cual ta haci'e contento y ta bisa cu e ta wak fruto di su trabao nan vol-



untario cu no ta bay sin un score pa Aruba. Ta bon pa menciona cu algun di e Miss Aruba nan ta haya contract nan lucrativo pa haci promocion pa paña, zapato, etc. pa marca nan Internacional y tambe a haya contract nan na cine, radio y television na canal nan Internacional, cual tin un Miss cu ainda ta eherce trabao na Hollywood como artista.

Ta bon pa remarca cu bao guia

Sigui lesa pag.17

Continuacion pagina.16



di Renny, el a sa di traha duro cu hoben nan y siña nan balor di ta hende muhe, y con pa haci promocion pa Aruba y asina saca e hoben nan aki di ta den un mundo negativo na unda peer pressure ta hunga un rol grandi riba e hoben nan aki cu awe ta disfruta di un bida positivo y ta profesional nan hopi prominente den comunidad di Aruba, tur e hoben nan aki awe ta gradici Renny pa muestra nan cu nan mester haci miho cu nan vida y pa Aruba.

Tur e esfuerzo nan aki ta y keda voluntariamente pa Renny, su mayor felicidad ta wak con di un hoben e transferi den un adulto responsabel pa su pais Aruba y famia. Atrrobe nos tin cu bisa tur ta basa riba trabao nan voluntario.

Remarcable ta cu Renny no ta guia Miss Aruba solamente, e ta

hopi activo den Carnaval tambe, Renny ta kere fervientemente cu Aruba mester resalta den Cultura tambe. Ta pa e motibo aki e ta dedica masha hopi mes den forma parti di grupo nan di Carnaval. Renny ta cuminsa na aña 1998 formando parti di committee pa grupo di Carnaval di Santa Cruz y na aña 1999 e ta forma parti di Dream Team Carnaval Group, tur aña e grupo aki a sa di destaca riba caya nan di Aruba durante parada nan di Carnaval y Lighting Parade cu Renny su diseño nan unico como tambe prepara e Reina di e grupo pa representa e grupo na Stadion, mayoria biaha cu resultado fenomenal.

DEN CULTURA:

Tanto den mundo di beyesa y carnaval, Renny a yega di forma parti tambe den e fiesta mas bunita di nos Dushi Aruba; dia di Himno y Bandera. Pa varios aña Renny tabata un motor grandi tras di e dia mas importante di Cultura di Aruba tempo cu e tabata eherce su trabao na departamento di cultura di Aruba.

Algo remarcable ta cu Renny ta persona cu semper ta zorg pa e Miss Aruba hiba e miho traha

nacional di Aruba pa muestra mundo henter algo di cultura di Aruba.

Renny ta un persona cu ta cla pa yuda cualquier persona cu aserke pa un guia sea den e mundo di beyesa, carnaval of cultural di nos Dushi Aruba, e ta un persona cu asina e bisa cu e ta cla pa yuda, e no ta ripara e tempo, dia nan largo y plaka, e no ta stop te ora e keda completamente cla y asina por tin un resultado 100 por ciento formidable, asina mes cu quebrante di salud pa algun tempo caba, e ta sigui traha voluntariamente pa hiba nos Dushi Aruba dilanti den posiciona e nomber di Aruba Internacionalmente positivo. Ademas di tur e caristica nan aki Renny ta un persona masha sencillo, humilde y ta trata tur hende igual sin importa color, raza, religion of status.

REACCION DI TOB:

Renny no ta para keto ora ta trata Carnaval di Aruba, y asina e ta join na aña 2010 e grupo di TOB tanto pa mucha chiquito nan, hoben y adulto nan. Renny ta diseña tur trahe y costum nan espectacular pa cada segmento y asina e grupo ta keda mayoria biaha como grupo di aña of ta gana premio nan pa diseño nan masha luhoso y creativo.

Ta bon pa menciona cu durante temporado di Carnaval, Renny ta keda traha incansablemente pa tur cos cana bon y pa tur costum keda perfecto. Claramente tur e trabao nan aki ta voluntario tambe. Te dia di awe, Renny ta forma parti di TOB carnaval group y ta trahando incansablemente riba disenjo nan pa e grupo keda resalta den parada nan.

Pesey esnan di TOB Carnival Group cu sentimento mixto, ta despedi, di un gran amigo, miembro di hunta di directiva, diseñador y creador di hopi di e pisesanan ganador.

Renny, un persona cu un caracter fuerte, directo y sincero, un gran carnavalista.

E famia di TOB ta gradicibo pa bo añanan di amistad y creatividad. Esnan di TOB tabata considera Renny como un ruman. Nan sa cu Renny lo bay haci hopi falta! Nan ta haya Renny como un perfeccionista y detayista semper cla pa yuda cu un conseho of zundra pa asina percura cu TOB lo luci riba caminda.

TOB lo haya falta di su zundramentonan manera: "Ranca e tela... no pege asina". "Pone mas piedra y stencchi, e mester brilla... ta TOB nos ta! No por bay con cu ta". Si boso no por traha drechi bay boso cas! Mi mes ta haci mi cosnan". "Respetami paso ta hende grandi mi ta! Mi ta mas bieu cu boso!" "Mi no tey pa semper! Siña traha netjes."

Na e otro banda Renny a sa di duna tambe e guia, conseho y elogio ora obra nan bunita cu worde elabora y presenta, pero si e no guste e lo bisa bo tambe. Riba ruta semper Renny tabata cla pa duna un man ora algo bay robes of kibra, un hotglue gun of stapler no por keda for di su mini tool box. Di biaha Renny ta cla pa busca un solucion.

Cu hopi dolor y tristesa den nos curason nos a wak Renny su salud bay atras. Pero Renny tabata tin un Fe grandi y a enfrenta e reto cu corahe y a keda lucha pa cada biaha pa un dia mas. Pero nos Dios a dicidi otro y a brase y tume den su reino. Danki pa bo amistad y cariño na e famia grandi di TOB Carnival Group. Bo lo haci falta!

JOHN FLEMMING:

John Flemming a bisa cu el a conoce Renny Lacle na aña 1986, ora cu e y su prima Shirley Lacle d.f.m. a bin pa inscribi pa participa den e grupo di carnaval Lee-Tai y despues a bira John Flemming Present, y nan tabatin grupo di Mucha y di Hende Grandi y despues cu e trabaunan a bira hopi, a laga e parti mucha cay, y sigui cu e parti di Adulto.

Renny a puntra cu si e por bin yuda, ya cu el a mira cu nos tabata tin hopi trabao, casi tur atardi pa anochi nan tabata tin un grupo cu tabata trahando bao dak na cas di Dochi Lee, unda cu e cede tabata. Combersando cu Renny door cu mi a ripara cu e tabata tin su ideanan y fantasia, el a bin conta cu tempo cu su defunto tata Eddy Lacle tabata den directiva di Club Caiquetio, semper el a yuda ey tambe hunto cu su famianan, y bo por bisa cu ta di aki ya Renny tabata tin e arte y creatividad, despues

di esaki el a bin yuda nos.

Renny a alivia e trabaonan di John Flemming pa cu Carnaval hopi mes, e tabata un ayudo hopi grandi y mi por a dune e responsabilidad, hunto cu nos famia di Carnaval, Renny a bira manera un famia, asina cu Carnaval caba, ya su siguiente siman ya e tin topico y schets cla caba, e tabata manera un style di motor den e grupo e tempo ey, y asina nos a keda te cu na momento cu mi a stop cu mi grupo di Carnaval na 1994, Carnaval 40, unda cu nos a presenta "Proverbionan na Papiamento" y asina hunto cu Renny nos a logra 2 biaha premio di Grupo di Aña, y tur aña nos ta logra premionan grandi den Carnaval.

Renny tambe tabata un di esnan cu tabata tras di e show di reina cu te awe hamas bisto y nunca por lubida tempo cu Marjorie Flemming a baha for di e hoogwerker di Brandweer, e hunto cu Ruth Croes-Geerman y otronan mas cu a yuda cu e show ey por a continua, un hilaridad cu mi ta corda e dia ey di Renny ta, cu debi cu SAC no a permiti e Hoogwerker di Brandweer touch e stage, nan tabata tin mester di un Trapi, ban pensa na unda lo por haya un. Renny a sali na careda y bay na cas di su omo Candy Hernandez, y e di e semper tin su trapinan ariba su auto, y un rato di ora Renny a fure cu tela y asina nos tabata tin trapi pa asina Marjorie por a baha riba stage... pero ta hopi hilaridad, nos tabata pasa durante e temporadanan di Carnaval hunto cu famianan Lampe, Kock, y Koolman di Papillon cu tambe tabata bin yuda bao dak.

Renny tambe ta un di e fundador di Aruba Internacional Costume Festival, despues cu varios aña nos tabata bay Curaçao, despues a bin e decision pa ban organise na Aruba mes. Renny semper ta pasa rond y controla con cada grupo ta prepara pa bay Curaçao y ta duna su sugerencia pa asina tur ta bon prepara, asina nos a sera un circulo di amistad cu casi tur grupo di Aruba. Renny asina tabata tin un amistad grandi cu demas gruponan di Marcia Stamper, Sylvia Lourenz y hopi mas. Despues cu mi a stop, un grupo di Carnivalistanan di Santa Cruz a acerca nos na 1998 pa forma parti di Dreamteam Sta Cruz, aki Renny tabata tin e encargo di Designer di trahenan Roadpiece y hopi mas, tambe e trahe di fantasia di e reinanan tabata tambe na su encargo, hunto cu Rita Lopez-Henriquez y Elizabeth Bikker y Mariana Oduber pa e decision final di e trahenan, y pe tabata un satisfacion ora cu un di reinanan logra e titulo maximo di Reina di Aruba su Carnaval.

Renny fuera di tabata traha pa gruponan di Carnaval ami hunto cu ne a traha trahe y decora pa diferente cantante di tumberito y Calypso, entre orto Rocco Franken, asina mi por sigui menciona.

Renny ta campion den locual ta decoracion di trahenan di fantasia pa Reinanan of pa Missnan.

Segun deseonan di Renny mes, su entiero lo bay ta priva. Condolencia na famianan.